

22 AUG 1998

Mahathir-tindakan

JANGAN SAMPAI EKONOMI LEBIH PARAH, KATA DR MAHATHIR

KOTA BAHARU, 22 Ogos (Bernama) -- Datuk Seri Dr Mahathir Mohamad berkata rakyat harus bertindak mulai sekarang untuk memulihkan ekonomi dan mempertahankan kemerdekaan negara ketika masih mempunyai kekuatan.

Perdana Menteri berkata rakyat tidak harus membiar sehingga tekanan ekonomi menjadi teruk seperti berlaku di negara-negara lain, turut terjadi di negara ini.

"Kita belum merasa tekanan ekonomi, belum merasa apa dia kegawatan tetapi jangan kita tunggu (sehingga seperti) apa yang berlaku di negara lain di mana 22 juta pekerja hilang kerja, rakyat tidak cukup makan, tidak ada ubat, tidak boleh bagi anak minum susu," katanya pada majlis Perhimpunan Cinta Negara, Pemimpin Bersama Rakyat di Sekolah Kebangsaan Kampung Chengal, Ketereh 20 km dari sini.

Yang turut hadir dalam ribuan rakyat itu ialah Datin Seri Dr Siti Hasmah Mohd Ali, Menteri Pembangunan Luar Bandar Datuk Annuar Musa, Menteri Pembangunan Usahawan Datuk Mustapa Mohamed, Yang Dipertua Dewan Negara Tan Sri Mohamed Yaakob dan bekas Timbalan Perdana Menteri Tun Ghafar Baba.

Dr Mahathir berkata: "Negara kita masih aman, tenang, stabil dan dalam keadaan ini kita masih mempunyai fikiran yang waras dan berkemampuan untuk menyusun langkah menghadapi cabaran yang dahsyat dihadapi sekarang."

Oleh itu, Perdana Menteri meminta rakyat supaya jangan mencetuskan huru-hara dalam negara "kerana ia melemahkan keupayaan kita untuk melawan serangan yang ditujukan kepada kita."

Beliau juga meminta rakyat mengambil kira tekanan yang menyebabkan nilai mata wang dan saham jatuh dan sebaliknya menguruskan perbelanjaan dengan bijak termasuk mengutamakan keluaran tempatan.

Kepada peniaga, Dr Mahathir berharap mereka mengutamakan jualan barangan keluaran tempatan dan menggunakan mata wang seperti Yen, Baht, Peso dan Ringgit jika perlu mengurus niaga di luar negara.

"Kalau rakyat bagi sokongan, kita akan dapat atasi percubaan untuk menjajah negara ini semula dan apa yang dibuat itu ialah untuk mempertahankan kemerdekaan negara kita, tidak kurang daripada itu," katanya.

Sambil meminta rakyat menghayati sambutan ulang tahun kemerdekaan negara ke-41 pada 31 Ogos ini, Dr Mahathir berkata: "Kalau kita anggap kita adalah bangsa yang merdeka, kita mestilah bertanggungjawab terhadap kemerdekaan itu."

-- BERNAMA

BD MAI